



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

KONFERÉNSIA IMPRENSA

JSMP husu Governu atu implementa política subsidiu \$200 ba uma kain tuir objetivu Dekretu-Lei Nú 37/2022 kona-ba Subsídu ba Uma Kain

Hanesan ita hatene katak, iha 6 Maiu 2022, Konsellu Ministru aprova ona Dekretu-Lei Nú 37/2022 kona-ba subsidiu tinan nia rohan (fim do ano) ba uma kain ho montante \$200. Ministériu Solidaridade Sosiál no Inkluzsaun (MSSI) hanesan institusaun implementadór ne'ebé halo hela preparasaun ba pagamentu ne'ebé sei hala'o iha fulan Novembru no Dezembru tinan ne'e.

Política subsidiáriu ne'ebé prevee iha Dekretu-Lei ne'e nu'udar transformasaun hanoin Estadu nian kona-ba oinsa bele kria justisa sosiál iha sosiedade nia let no iguallade tratamentu ba sidadaun hotu iha distribuissau apoio sosiál sira.

Tanba ne'e, iha Dekretu-Lei ne'e prevee katak durante ne'e, Estadu valoriza serbisu no esforsu funsióriu no ajente sira Administrasaun Públiku nian hodi aprova no halo pagamentu estraordináriu ba saláriu aisionál ka saláriu fulan 13 iha tinan nia rohan. Estadu mós iha parte ida, tuir lei ne'e, rekoñese katak atribuissau ba prestasaun serbisu ba traballadór sira instituissau públiku sira Estadu nian kria ona deziguallade no injustisa sosiál ba sidadaun sira ne'ebé la hetan asesu.

Nune'e mak, objetivu husi Dekretu-Lei ne'e atu fó apoio subsidiáriu ba uma kain sira ne'ebé mak ekonomikamente vulnerável tanba la iha serbisu no rendimentu fiksi no mós la asesu ba direitu no regalia sira funsióriu no ajente sira administrasaun públiku hetan, partikularmente pagamentu estraordináriu ba saláriu adisionál iha tinan nia rohan ka saláriu fulan 13 nian. Ida ne'e signifika katak benefisiáriu ka titulár ba subsidiu ida ne'e sei la inklui funsióriu no ajente sira Administrasaun Públiku nian.

Maibé iha notisia RTLL datadu 15 Setembru 2022, Vice Ministru Administrasaun Estatal (MAE) halo fali deklarasaun ne'ebé sees ka kontráriu husi Dekretu-Lei refere katak subsidiu ne'e sei atribui ba uma kain hotu no sei la haree kargu no tabela salariál. Alende deklarasaun Vice Ministru nian ne'e, iha mós informasaun kredivel no konfirmadu husi liña ministerial relevante sira katak subsidiu ne'e atribui ba uma kain hothotu, inklui funsióriu no ajente públiku ne'e nu'udar orientasaun husi Konsellu Ministru.

Tanbá ne'e, bainhira MSSI halo tuir deklarasaun Ministru no orientasaun Konsellu Ministru nian ne'e, tuir JSMP nia haree sei hamosu situasaun sira hanesan tuir mai ne'e:

1. halo situasaun ida injustisa sosiál sai aat liu tan tanba funsionáriu no ajente sira Administrasaun Públika nian ne'ebé hetan ona pagamentu saláriu adisionál fulan 13 sei hetan tan subsidiu ida ne'e.
2. Governu rasik hatudu inkumprimentu ba norma lejizlativa sira ne'ebé nia rasik prodús no ida ne'e sei kria presedente la di'ak ba futuru.
3. sei hamosu malgastu significativu no desnesesáriu no mós hamosu prejuizu ba Estadu liuhusi orsamentu jerál Estadu, tanba ema ne'ebé la tama iha kondisaun vulnerável no la iha direitu tuir lei ka la'ós titulár, asesu hotu ba subsidiu ne'e. Ida-ne'e hanesan mós forma ida insulta ba povu kbi'it laek (familia vulnerável liu) ne'ebé tuir lei konsidera nu'udar benefisiáriu alvu úniku;
4. sei prejudika esforsu sira nível Estadu atu promove governasaun di'ak no kombate korrupsaun tanba la iha polítika no jestaun ida ne'e di'ak no apropriadu ba uza orsamentu Estadu nian.
5. Rezolusaun Governu no Diploma Ministeriál sira ne'ebé Governu prodús hodi distribui subsidiu ne'e la'ós aktu lejizlativu maibé aktu normativu no administrativu ne'ebé kria hodi implementa programa no polítika jerál sira ne'ebé regula iha lei no deketu-lei sira, tanba ne'e la bele altera no kontráriu ho Dekretu-Lei n.º 37/2022.

Bazeia ba razaun hirak ne'ebé mensiona iha leten, JSMP hakarak rekomenda ba:

a) **Parlamentu Nasionál:**

Atu estabelese Komisaun Inkéritu Eventuál ida hodi fiskaliza implementasaun programa subsidiu uma kain. Nune'e, bele asegura katak orsamentu Estadu no subsidiu ne'e monu duni ba familia sira ne'ebé vulnerável no nesesita duni apoiu Estadu nian no nu'udar titular ba subsidiu ne'e tuir lei.

b) **Governu (MSSI no MAE)**

- Atu atualiza dados benefisiáriu ba subsidiu uma kain nian hodi nune'e bele ajuda no define ho loloos se de'it mak iha direitu ba subsidiu refere no familia hothotu ne'ebé tama iha kategoria vulnerável no nu'udar titulár bele asesu;
- Atu hasai tiha orsamentu ne'ebé aloka ba funsionáriu no ajente sira Administrasaun Públika nian hodi aloka ka aumenta fali ba benefisiáriu ka titulár sira tuir deketu-lei ne'e;

c) **Provedoria Direitu Umanu no Justisa-PDHJ:**

Uza nia kompeténsia konstitusionál tuir provizaun Artigu 150 hodi husu fiskalizona abstratu ba aktu lejizlativa no normativa sira atu labele kontráriu ho Konstituisaun no lei sira.

d) **Komisaun Anti-Korrupsaun (CAC)**

Husu ba CAC atu halo akompañamentu ida ho ativu no rigór ba implementasaun subsidiu ne'e atu bele halo tuir de'it lei no loke investigasaun ba responsável sira bainhira iha implementasaun ne'e, rejulta ka lori estadu sofre prejuízu ruma.

e) Ba sosiedade Timor/Timoroan hotu;

Husu ba elementu sosiedade tomak no partikularmente ba sosiedade sivil, média, movimentu no akadémiku sira hotu atu haree no akompaña programa ne'e, tanba ida ne'e, ezije ita hotu ninia observaun krítika hodi asegura rekursu povu no estadu nian implementa tuir lei no evita despeza desnecesáriu sira ne'ebé lori prejuizu ba Estadu no povu.

Rekomendasaun ikus: ba kualkér Governu no governasaun iha futuru, JSMP husu atu halakon tiha tipu programa no política subsidiáriu sira ne'ebé tuir JSMP hanoin la sustentável no la eduka povu sai badinas no produtivu, maibé kria fali situaun dependénsia ba Estadu, halo comunidade sai pasiva no la produtiva ne'ebé sei tau todan liu tan ba gastu sira Estadu no la kontribui ba hamoris no hasa'e ekonomia comunidade no dezvoltamentu ekonómiku.

Atu konklui KONFERÉNSIA IMPRENSA ne'e ami husik hela pergunta ida ba ita hotu atu reflète, se funsináriu no ajente públiku sira simu ona saláriu désimu terseiru – simu tan subsidiu \$200 ba uma kain ne'e atu kria justisa sosiál ka kria no hakle'an liu tan injustisa sosiál ba povu kbit la'ek sira.

Dili, 28 Setembru 2022